

Aktuelnosti:

1. Konferencija «Funkcionisanje sistema uprave i status zaposlenika u organima uprave u Federaciji BiH»
2. Konferencija «Zajedno izgradimo mirnu budućnost – Omladinske banke»
3. Vlada FBiH odobrila izdvajanje iz budžeta za transfere općinama
4. Održan seminar za partner općine FBiH i K. Norveške
5. Prozor/Rama: Trening o upravljanju projektnim ciklusom
6. Održana obuka o razvoju ekoturizma u zaštićenim područjima
7. U Vitezu otvoren ured Evropskog pokreta
8. Evroazijski kongres lokalne samouprave
9. NAJAVA 12. sjednice Predsjedništva Saveza
10. NAJAVA Konferencije o uvođenju trezorskog/rizničnog poslovanja u općinama

Poštovani članovi i čitaoci,

Kao i do sada, obavještavamo Vas o unutrašnjoj i vanjskoj komunikaciji i razmjeni najboljih iskustava i praksi kao i o različitim obukama koje mogu doprinijeti kadrovskom jačanju općinskih službenika.

Putem ovog biltena se možete informirati i o drugim dešavanjima u proteklom periodu kao što su konferencije, seminari, okrugli stolovi a koji mogu doprinijeti unapređenju



NAJAVA

MEĐUNARODNI SAJAM OPĆINA

Sarajevo, 10-11. mart/ožujak 2011

NALAS-a (Mreža asocijacija lokalnih vlasti jugoistočne Evrope, www.nalas.eu) u suorganizaciji Saveza općina i gradova Federacije BiH organizira Sajam općina i gradova jugoistočne Evrope.

Sajam će se održati u Sarajevu dvorana Zetra u periodu 10. – 11. mart/ožujak 2011. godine.

Na sajmu se očekuje učešće velikog broja delegacija jedinica lokalne samouprave iz 14 država članica NALAS-a ali i drugih gradova Evrope. Uz to veliki broj lokalnih i međunarodnih organizacija, potencijalnih investitora i poslovnih kompanija će biti predstavljeni na ovom sajmu. Ovaj događaj podržalo je i Predsjedništvo Skupštine Saveza općina i gradova Federacije BiH.

Elektronsku verziju brošure o Sajmu možete pogledati na www.nexpo.nalas.eu, a registraciju za učešće već sada možete popuniti na istoj web stranici.

Molimo Vas da izvijestite potencijalne izlagače sa područja vaše općine/grada o ovom događaju te planirate sredstva u budžetima za predstavljanje vaše općine/grada na ovom sajmu.



sistema lokalne uprave.

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: dino@sogfbih.ba

Molimo vas da ovaj elektronski bilten proslijedite svim zainteresiranim u vašoj i susjednim općinama.

Ukoliko želite da objavite neke od vaših novosti, iskoristite elektronski bilten Saveza, koji je brz, efikasan i jeftin način komuniciranja sa javnošću.

Sa zadovoljstvom očekujemo vaše komentare, sugestije i primjedbe.

[Kontaktirajte nas](#)

[Telefoni:](#)

033/ 216 502, 033/ 552 810
033/ 552 812

[Fax:](#) 033/552 811

<http://www.sogfbih.ba>

<http://www.partnerstvogradova.ba/>

<http://www.nexpo.nalas.eu>

e-mail: amir@sogfbih.ba

NAŠ CILJ je informirati vas o seminarima, treninzima, konferencijama i drugim aktivnostima, koji unapređuju lokalnu upravu i kadrovsko

ODRŽANA KONFERENCIJA NA TEMU: "FUNKCIONISANJE SISTEMA UPRAVE I STATUS ZAPOSLENIH U ORGANIMA UPRAVE U FBiH – NORMATIVNI OKVIR"



SARAJEVO, 07. decembar/prosinac – Agencija za državnu službu Federacije BiH i Federalno ministarstvo pravde su, uz podršku OSCE misije u BiH, organizirali dvodnevnu Konsultativnu konferenciju: "Funkcionisanje sistema uprave i status zaposlenih u organima uprave u Federaciji BiH-Normativni okvir" dana 06. i 07. decembra 2010. godine u Sarajevu.

Prevashodni cilj Konferencije je aktivno uključivanje predstavnika sva tri nivoa vlasti u Federaciji radi otklanjanja nedostataka i nedorečenosti normativnog okvira u upravljanju ljudskim resursima u organima uprave u Federaciji BiH.

Na Konferenciji je prisustvovao veliki broj predstavnika iz općinskih, kantonalnih i federalnih organa vlasti u BiH. Među prisutnima su bili i predstavnici međunarodnih institucija u BiH (OSCE, UNDP, GAP 2, Delegacija Evropske unije u BiH). U ime Saveza općina i gradova Federacije BiH konferenciji su prisustvovali: Ivo Jerkić Ino (predsjedavajući Skupštine Saveza), Husejin Smajlović (predsjednik Predsjedništva Skupštine Saveza), Vlado Alilović (zamjenik predsjednika Predsjedništva Skupštine Saveza), Rasim Omerović (član Predsjedništva Skupštine Saveza), Selver Keleštura (predsjednik Radne grupe Saveza) i Elvira Imširović-Bolić (Stručna služba Saveza).

Nj.E. ambasador Gary Robbins, šef misije OSCE-a u BiH, Nj.E. premijer FBiH Mustafa Mujezinović i Federalni ministar pravde, Feliks Vidović, su u pozdravnom govoru istakli da je ovaj događaj jedinstvena prilika za stručnjake i kreatore politike da na jednom mjestu otvore dijalog o budućnosti državne službe u Federaciji, a sve u cilju postizanja efikasne, transparentne i odgovorne državne službe koja bi bila na usluzi svim građanima BiH. Uvodne prezentacije tokom dvodnevne konferencije imali su direktor Agencije za državnu službu Federacije BiH, Sead Maslo, pomoćnik federalnog ministra pravde BiH, Ivan Matešić, predsjednica Ustavnog suda FBiH, Kata Senjak, predsjednik Sindikata državnih službenika i namještenika u organima državne službe, sudskoj vlasti i javnim ustanovama u FBiH, Salih Kruščica, te predstavnik Akademске zajednice prof.dr. Zenaid Đelmo. G-đa Dženana Adalajbegović je predstavila "Strategiju obuke za jedinice lokalne samouprave u FBiH".

Učesnici konferencije su bili podijeljeni u dvije radne grupe koje su analizirale dva teksta zakona: Zakon o zaposlenicima u jedinicama lokalne samouprave u Federaciji BiH i Zakon o državnim službenicima i namještenicima u organima državne službe u Federaciji BiH.

Na kraju Konferencije i rasprava u grupama usvojen je Zaključak o hitnosti donošenja cjelovitog zakonskog rješenja za državnu službu u Federaciji BiH, pri čemu se ne smije odstupiti od osnovnih principa i postignutih standarda u reformi javne uprave. Također je zaključeno da se Strategija za obuku u jedinicama lokalne samouprave uputi na usvajanje Vladi FBiH.



jačanje zaposlenih u vašim općinama.

**KORISNI LINKOVI ZA
PREDPRISTUPNE FONDOVE:**

<http://www.southeast-europe.net/en/>

<http://www.adriaticipacbc.org/>

<http://www.interregadriatico.it/index1.html>

<http://www.europa.ba/>

<http://www.cbib-eu.org/en/welcome/index.html>

<http://www.cbc.bih-mne.org/>

<http://www.srb-bih.org/>

<http://www.cbc-cro-bih.net/>

<http://www.programmemed.eu/>

<http://www.tacso.org/>

<http://www.euroinfocentar.ba/>

<http://www.balkanfund.org/>

GODIŠNJA KONFERENCIJA "ZAJEDNO IZGRADIMO MIRNU BUDUĆNOST- OMLADINSKE BANKE"



SARAJEVO, 3. decembar/prosinac - Ambasador SAD u BiH Patrik Mun (Patrick S. Moon) otvorio je u Sarajevu godišnju konferenciju "Zajedno izgradimo mirnu budućnost- Omladinske banke".

U svom uvodnom obraćanju, ambasador Mun je izrazio zadovoljstvo da mladi ljudi iz cijele BiH ulažu napore da poboljšaju stanje u državi i integraciju BiH u Evropsku uniju (EU) učine bržom.

Menadžer projekta "Omladinske banke" Željko Pauković pojasnio je da je osnovni cilj projekta podržati aktivno učešće mladih u procesima donošenja odluka i njihov veći angažman u lokalnim zajednicama, zatim omogućiti pristup i upravljanje resursima za implementiranje tih inicijativa, te da izgrade svoje vještine upravljanja i steknu povjerenje u sebe, kao lidere i nositelje društvenih promjena.

Prema riječima Paukovića, Projekat obuhvata aktivnosti u 15 općina u BiH; Doboj jug, Gornji Vakuf-Uskoplje, Kotor Varoš, Kozarska Dubica, Novi Grad, Novi Travnik, Modriča, Mrkonjić Grad, Šipovo, Šekoviće, Tešanj, Zavidoviće i Žepče.

Na današnjoj konferenciji je promoviran koncept omladinske inicijative za razvoj zajednice, a u nastavku je planirano da 170 mladih iz svih krajeva BiH prezentira rezultate 142 projekta, koja su inicirali mladi, a implementirala Fondacija Mozaik u općinama širom BiH.

Tokom dvije godine, putem projekta Omladinskih banaka planirana je implementacija oko 220 projekata koje će inicirati mladi, a koji će obuhvatiti oko 2.000 mladih ljudi različite etničke pripadnosti.

Program Omladinskih banaka se fokusira na mlade i njihove lokalne zajednice, ali zahtijeva i finansijsku podršku lokalnih vlasti.

Ukupna vrijednost projekta je 260.000 USD, a sredstva je osigurala Američka agencija za međunarodni razvoj (USAID) i deset općina, dok su mladi prikupili 150.000 USD kroz donacije pojedinaca i firmi u njihovim sredinama.

VLADA FBIH: ODOBRAVANJE DIJELA BUDŽETSKIH SREDSTAVA IZ TRANSFERA DRUGIM NIVOIMA VLASTI

SARAJEVO, 2. decembar/prosinac – Vlada Federacije BiH (FBiH) danas je u Sarajevu donijela pet odluka o odobravanju dijela budžetskih sredstava iz Transfera drugim nivoima vlasti - grant općinama.

Prema ovim odlukama, općini Stolac namijenjeno je 500.000 KM, Bosanskoj Krupi 400.000 KM, Olovu 300.000 KM i Kladnju i Maglaju po 200.000 KM.

DVODNEVNI SEMINAR ZA PARTNER OPĆINE FBiH I KRALJEVINE NORVEŠKE



SARAJEVO, 1. – 2. decembar/prosinac - U Sarajevu je u organizaciji Norveške asocijacije lokalnih i regionalnih vlasti (KS) i Saveza općina i gradova Federacije BiH realiziran je dvodnevni seminar za partnerske općine Federacije BiH i Kraljevine Norveške.

Cilj seminara je bio da se Općine koje imaju uspostavljenu međusobnu dugogodišnju saradnju informišu o kvalitetu i karakteru te saradnje, oblastima, kao i o daljnjim mogućnostima njihovog razvoja.

Prvi dan seminara, Savez općina i gradova Federacije BiH održao je dvije prezentacije na temu «Glavni izazovi za jedinice lokalne samouprave u Federaciji BiH» i «Strateške aktivnosti Saveza za period 2010. – 2013.»

Direktorica Saveza općina i gradova FBiH Vesna Travljanin u svom uvodnom izlaganju izrazila je zadovoljstvo uspješnom petogodišnjom saradnjom sa KS-om na projektima koji za cilj imaju jačanje svijesti o značaju lokalne samouprave, a koji se odnose na unapređenje rada i jačanje predstavničkog tijela u jedinicama lokalne samouprave FBiH kroz seminare za općinske vijećnike i načelnike.

Gđa. Travljanin je istakla da misija Saveza podrazumijeva, između ostalog, promoviranje demokratske i učinkovite lokalne vlasti putem zastupanja zajedničkih interesa svojih članica na razini Federacije BiH, pružanje profesionalnih usluga članicama, te stvaranje platforme za razmjenu znanja i informacija.

Strateška opredjeljenja Saveza u budućnosti, odnose se na uspostavljenje i razvitak funkcija lokalne samouprave, zatim usklađivanje domaćeg zakonodavstva, djelovanje prema središnjoj vlasti, razvijanje strategije ekonomskog razvitka, saradnju entitetskih saveza, jačanje međunarodnih odnosa i prekogranične saradnje, te saradnju s udruženjima, nevladinim i međunarodnim organizacijama.

Drugi dan seminara je bio rezervisan za izlaganja općina koje su uključene u zajedničke projekte. To su općine Donji Vakuf i norveška Općina Klepp koje imaju razvijenu saradnju u oblasti univerzalnog dizajna. Saradnja se odnosi na prilagođavanje prilaza javnim prostorima, objektima i ustanova o kojima skrbi Općina osobama sa invaliditetom. Zatim općine Konjic i Sund, čija saradnja se

odnosi na oblast osiguravanja boljih uvjeta iz oblasti obrazovanja i socijalne skrbi za hendikepirana lica, te Grad Mostar i Općina Orkdal čija je saradnja razvijena u oblasti predškolskog obrazovanja.

Ispred Norveške asocijacije lokalnih i regionalnih vlasti, seminaru je prisustvovao gđin Thomas B. Scheen, visoki savjetnik za međunarodne odnose, koji je pojasnio da se saradnja odnosi na projekte socijalne i zdravstvene zaštite, između ostalog, na uspostavi funkcionalnih sistema u školama i ustanovama za djecu, odnosno osobe sa posebnim potrebama, dok bi se u narednom periodu ta saradnja trebala proširiti na oblasti iz sektora agrikulture.

OSCE ORGANIZOVAO TRENING 'UPRAVLJANJE PROJEKTNIM CIKLUSOM'



PROZOR/RAMA, 1. decembar/prosinac – Misija OSCE-a u BiH, u saradnji s Općinom Prozor/Rama organizirala je trening za predstavnike mjesnih zajednica i uposlenike

Općine Prozor/Rama o temi "Upravljanje projektnim ciklusom".

Svrha ovog treninga je pružanje podrške mjesnim zajednicama prilikom osmišljavanja i upravljanja projektom, kao i uposlenicima Općine Prozor/Rama.

Učesnici su se mogli upoznati sa svim fazama kreiranja projekta, od ideje do realizacije, koje će moći praktično primjenjivati u rješavanju problema od općeg interesa za lokalnu zajednicu.

Općina Prozor/Rama u proteklom periodu pripremila je pravnu osnovu za osnivanje mjesnih zajednica, te organizovala izbore za predstavnike građana u strukturama mjesnih zajednica.

Kao rezultat toga, svaka mjesna zajednica je dobila svoje predstavničko tijelo koje će u narednom periodu pokazati sposobnost za predstavljanje građana i zastupanje njihovih interesa.

Kako bi što bolje odgovorili izazovima koji su pred njima, organizovan je i današnji trening za novoizabrane predsjednike mjesnih zajednica, kao i za uposlenike Općine Prozor/Rama koji će direktno i indirektno biti uključeni u rad i komunikaciju sa mjesnim zajednicama. Osim ovog treninga, planirano je i održavanje treninga pod nazivom 'Lobiranje i zastupanje' koji će se održati za učesnike današnjeg treninga.

OBUKA "RAZVOJ (EKO)TURIZMA U ZAŠTIĆENIM PODRUČJIMA"



SARAJEVO, 30. novembar/studeni - U okviru realizacije projekta "Jačanje kapaciteta za upravljanja područjima od izuzetne prirodne vrijednosti", na Ilidži je danas počela dvodnevna obuka "Razvoj (eko)turizma u zaštićenim područjima".

Cilj obuke je da se pružit znanje profesionalcima koji na bilo koji način imaju dodira sa upravljanjem, zaštitom ili promocijom zaštićenih područja na teme koje se tiču razvoja (eko)turizma. Obuka se organizira u saradnji sa slovenačkom konsultantskom kućom OIKOS-Savjetovanje za razvoj, d.o.o.

Voditelj projekta "Jačanje kapaciteta za upravljanja područjima od izuzetne prirodne vrijednosti" Irem Silajdžić kazala je da je glavni cilj projekta izgradnja

kapaciteta za održivo upravljanje i korištenje prirodnih područja u funkciji razvoja eko turizma.

"Projekat se paralelno izvodi u tri prirodna područja: Spomenik prirode Vrelo Bosne u Kantonu Sarajevo (BiH), Gornji tok rijeke Dretulje u Plaškom (Hrvatska), te Planina Ljubišnja u Pljevljima (Crna Gora)", izjavila je za Agenciju ONASA I. Silajdžić. Prema njenim riječima, kroz Projekat će se pripremiti alati za upravljanje područjima od izuzetne prirodne vrijednosti, te izgraditi kapaciteti relevantnih organizacija za njihovo korištenje, kao i generalno za upravljanje tim područjima.

I. Silajdžić je dodala kako će i lokalna zajednica biti upoznata sa mogućnostima i koristima koje se postižu razvojem eko turizma u navedenim područjima.

U okviru projekta, u narednoj godini, planirano je da se lokalna zajednica animira za učešće u razvoju eko turizma i turističke ponude kroz izradu lokalnih proizvoda i njihov plasman na tržištu.

Projekat, koji se provodi od početka ove godine, a trajeće 24 mjeseca, finansira Evropska unija (EU) sa 80 posto, a Ministarstvo prostornog uređenja i zaštite okoliša KS sa 20 posto.

Partneri u realizaciji projekta "Jačanje kapaciteta za upravljanja područjima od izuzetne prirodne vrijednosti" su nevladine organizacije (NVO) "Centar za okolišno održivi razvoj Sarajevo" iz BiH, Park prirode "Logarska dolina" iz Slovenije, Ekološka udruga "Kako je zelena moja dolina" Plaški iz Hrvatske i "Fondacija za razvoj sjevera Crne Gore" Pljevlja iz Crne Gore, te Ministarstvo prostornog uređenja i zaštite okoliša KS.

U VITEZU OTVOREN URED EVROPSKOG POKRETA



VITEZ, 29. novembar/studeni – Visoki predstavnik i specijalni predstavnik Evropske unije (EU) u BiH Valentin Inzko (Inzko) otvorio je danas kantonalni Ured Evropskog pokreta u BiH, u Franšiznom centru BiH u Vitezu.

Otvaranju Ureda prisustvovao je načelnik Općine Vitez Vlado Alilović, ambasador Republike Hrvatske u BiH Tonči Staničić i druge ugledne zvanice javnog i društvenog života.

Prije otvaranja Ureda Evropskog pokreta, programom je realizirana kraća posjeta općini Vitez, kao i razgovor visokog predstavnika Inzka i ambasadora Staničića sa načelnikom Općine, te obilazak privrednog postrojenja u Poslovnoj zoni Vitez.

Na konferenciji za novinare, Visoki predstavnik u BiH Valentin Inzko rekao je da je vrijeme da BiH ne zaostaje na evropskom putu i naglasio da će zemlja dobiti status kandidata za četiri do pet godina.

Inzko je podsjetio da je pritisak javnosti doveo do toga da su se politički lideri u BiH



fokusirali na ispunjavanju uslova za liberalizaciju viznog režima, a Evropski pokret odigrao je značajnu ulogu u tome.

"Vlast je kasno počela, ali je pod pritiskom javnosti ipak brzo uradila svoj posao i ispunila 174 uslova, te počela izdavati biometrijske pasoše, rekao je Inzko.

Inzko je naglasio da su poduzetništvo

i biznis u Vitezu najbolji primjer kako se može sa evropskim standardima ući u Evropu, a da još niste član.

Nakon konferencije za novinare, Inzko i ambasador Staničić razgovarali su sa uspješnim menadžerima i poduzetnicima Viteza i susjednih općina regiona, u prostorijama Franšiznog centra BiH - hotel "Central" u Vitezu.

Nakon ureda u Zenici, Gračanici i Zavidovićima, kancelarija u Vitezu (u poslovnoj zgradi hotela "Central" – Franšizni centar BiH) će biti četvrti biro Evropskog pokreta na teritoriji BiH.

U pripremi su otvaranje prostorija u Banjaluci i na Palama, početkom naredne 2011.godine.

I. KAMOČAJI NA 2. EUROAZIJSKOM KONGRESU LOKALNE SAMOUPRAVE U ISTANBULU

SARAJEVO, 28. novembar/studen - Na poziv predsjednika Svjetske unije turskih općina Nihata Zeybekcija, zamjenik gradonačelnika Sarajeva Igor Kamočaji i pomoćnica gradonačelnika za urbano planiranje Nedreta Komarica učestvovali su u radu 2. Euroazijskog kongresa lokalne samouprave, koji se održao u Istanbulu na temu „Planiranje i urbana transformacija“.

U svom obraćanju u diskusiji na prvoj sesiji „Proces izrade prostornog plana“, dogradonačelnik Kamočaji je kazao da je Grad Sarajevo danas u potrazi za novim urbanističkim planiranjem, prilagođenim njegovim potrebama.

Istaknuo je ciljeve prostornog razvoja i uređenja grada Sarajeva, te dodao da „osnovu za budući razvoj grada čine aktivnosti na sanaciji, rekonstrukciji i revitalizaciji najvećeg broja postojećih naselja, podizanje kvaliteta građevinskog fonda, obezbjeđenje odgovarajuće funkcionalno-teritorijalne povezanosti i ujednačavanje stepena urbanog i komunalnog standarda u cilju smanjenja razlika u kvaliteti življenja između centra i periferije grada“.

Pomoćnica gradonačelnika za urbano planiranje Nedreta Komarica upoznala je skup sa aktivnostima na pripremi, izradi i donošenju regulacionih planova, što je jedna od osnovnih ingerencija Grada Sarajeva.

Tokom Kongresa, dogradonačelnik Kamočaji je imao i bilateralne razgovore sa predsjedavajućom Komiteta za međunarodnu saradnju i EU iz Istanbula Serpil Bagriacik, i tom prilikom predložio nekoliko projekata za konkretniji nastavak





saradnje dva pobratimska grada.

Inače, Kongres se održava u organizaciji Svjetske unije turskih općina i Turske agencije za međunarodnu saradnju i razvoj, uz podršku Ministarstva za kulturu i turizam R Turske, te Unija općina Turske i Marmara. Učesnici Kongresa su radili u četiri sesije: „Proces izrade prostornog plana“, „Zaštita urbanog identiteta i očuvanje baštine“, „Prakse urbanih transformacija“ i „Prakse urbanog dizajna“,

nakon čega je donijeta i Deklaracija o planiranju i urbanoj transformaciji.

NAJAVA

ODRŽAVANJA

DVANAESTE SJEDNICE PREDSEDNIŠTVA SKUPŠTINE SAVEZA OPĆINA I GRADOVA FEDERACIJE BOSNE I HERCEGOVINE

Savez općina i gradova Federacije Bosne i Hercegovine (SOGFBiH), najavljuje da će se Dvanaesta sjednica Predsjedništva Skupštine Saveza općina i gradova Federacije Bosne i Hercegovine održati u utorak, 14.12.2010. godine u ZAVIDOVIĆIMA.

Na sjednici članovi Predsjedništva će biti detaljno upoznati o dosadašnjim aktivnostima na Zakonu o uposlenicima u organima jedinica lokalne samouprave koji je izradio Savez. S obzirom na ozbiljnost situacije u kojoj su se našle jedinice lokalne samouprave nakon Presude Ustavnog suda Federacije BiH od 20. aprila ove godine kojom je presuđeno da je Zakon o državnoj službi Federacije BiH neustavan u dijelu koji se odnosi na kanton, grad i općinu, Savez je pristupio izradi novog zakona koji tretira radno-pravni status uposlenika u jedinicama lokalne samouprave. Predsjedništvo će na ovoj sjednici zauzet stav u pogledu daljih aktivnosti Saveza u ovoj oblasti, u saradnji sa Federalnim ministarstvom pravde i Agencijom za državnu službu Federacije BiH.

Pored Prijedloga Zakona o uposlenicima u organima jedinica lokalne samouprave, Predsjedništvo će se upoznati o aktivnostima na izradi Kodeksa o među-administrativnim odnosima u Federaciji BiH koji će biti ponuđen Vladi Federacije BiH na potpisivanje nakon konstituisanja nove Vlade. Potrebu za izradom ovakvog dokumenta Savez je inicirao još 2008. godine. Kodeks je izradio Savez općina i gradova FBiH, a tretira međuadministrativne odnose između različitih nivoa vlasti u Federaciji BiH (općina, kanton i entitet), a prije svega odnos između Saveza, Parlamenta i Vlade Federacije BiH.

Predsjedništvo će također, biti upoznato sa realiziranim aktivnostima na pripremi **Sajma općina i gradova Jugoistočne Evrope** koji će se održati 10. i 11. marta iduće godine u Sarajevu. To će biti prilika za predstavljanje lokalnih zajednica iz 12 zemalja članica NALAS-a (Mreža lokalnih i regionalnih vlasti Jugoistočne Evrope). Za više informacija o sajmu pogledajte www.nexpo.nalas.eu. Zatim, o projektu «Moje dvorište» kojeg realizira Savez uz pomoć Švajcarske razvojne agencije (SDC). Projekat realiziramo u saradnji sa NTV Hayat, a radi se o 16 TV emisija koje će se emitovati dva puta mjesečno. Nadalje, biće najavljena konferencija o trezorskom

poslovanju, koja je namijenjena općinama, a održati će se u Sarajevu, 17.12.2010. godine, kao i osam radionica koje će se održati početkom sljedeće godine. Biće govora još o nizu drugih aktivnosti, događaja i susreta koje organizira Savez a tiču se naših članica, kao što su: izbor regionalnih lokaliteta za edukaciju uposlenika i izabраних predstavnika na lokalnom nivou, Projektu Beacon Schema, prekograničnoj saradnji, i sl.

Predsjedništvo će raspravljati i o nizu drugih pitanja koja su značajna i aktuelna za rad jedinica lokalne samouprave u Federaciji BiH.

Dvanaesta sjednica Predsjedništva Skupštine Saveza općina i gradova Federacije BiH će se održati 14.12.2010. godine (utorak) u 11:00 sati u ZAVIDOVIĆIMA, Velika sala Općine Zavidovići, ul. Safvet bega Bašagića bb

NAJAVA

KONFERENCIJA NA TEMU „UVOĐENJE TREZORSKOG/RIZNIČNOG POSLOVANJA NA LOKALNOM NIVOU“

**Sarajevo, Hotel „Sarajevo“
17. decembar/prosinac 2010. godine**

U organizaciji Saveza općina i gradova Federacije Bosne i Hercegovine, a u saradnji sa projektom Jačanje lokalne samouprave Njemačkog društva za tehničku saradnju (GTZ), u Sarajevu, 17. decembra/prosinca održat će se Konferencija na temu **“Uvođenje trezorskog/rizničnog poslovanja na lokalnom nivou”**.

Svjesni činjenice da općine i gradovi u Federaciji BiH stoje pred velikim zadatkom koji zahtijeva ulaganje ogromnih napora, znanja i resursa za provođenje Zakona o izmjenama i dopunama Zakona o trezoru/riznici u Federaciji Bosne i Hercegovine i drugih propisa, Savez općina i gradova Federacije BiH je odlučio da svojim članicama osigura dodatnu pomoć u ovom procesu.

Konferencija je namijenjena **načelnicima/gradonačelnicima** Federacije BiH, te **pomoćnicima načelnika za finansije/financije**, kao uvod u niz radionica na temu uvođenja trezorskog/rizničnog poslovanja, koje će se održati od januara/siječnja do marta/ožujka 2011. godine.

Na Konferenciji će se, između ostalih, obratiti gđin **Vlado Alilović**, zamjenik predsjednika Predsjedništva Skupštine Saveza, gđin **Edgar Schöder**, Team Leader projekta Jačanje lokalne samouprave, GTZ, **Vesna Travljanin**, direktor Saveza općina i gradova Federacije BiH, gđin **Petar Ivošević**, Federalno ministarstvo finansija/financija, gđin **Emir Dedović**, pomoćnik načelnik za finansije Općine Novi Grad Sarajevo, gđin **Alija Ramović**, samostalni konsultant. Moderator će biti gđin **Adnan Rondić**.

